

চ.বিতে লাগাতার অবরোধের ষষ্ঠ দিন অতিবাহিত

শিবির ক্যাডাররা অস্ত্রশস্ত্র সহ হলে অবস্থান করছে

চা. বি প্রতিবেদক : চট্টগ্রাম বিশ্ববিদ্যালয়ে বিরাজমান অচলাবস্থা অব্যাহত রয়েছে। গত ৬ দিন যাবৎ বিশ্ববিদ্যালয়ের সকল প্রশাসনিক ও একাডেমিক কার্যক্রম বন্ধ রয়েছে। সকল পরীক্ষা আগামী ১ অক্টোবর

পর্যন্ত স্থগিত করা হয়েছে। বিশ্ববিদ্যালয় সিনেটের শিক্ষক নির্বাচনও স্থগিত করা হয়েছে। ছাত্রলীগ ও শিবিরের অনমনীয় মনোভাবের ফলে অচলাবস্থা নিরসনের কোনো সম্ভাবনা দেখা যাচ্ছে না। গত রোববার হল তত্ত্বাশির পরও

পরিস্থিতির উন্নতি হয়নি। বিভিন্ন হল তত্ত্বাশির পরপরই শিবিরের সশস্ত্র ক্যাডাররা পুনরায় হলে প্রবেশ করেছে। তারা অস্ত্রশস্ত্র ও গোলাবারুদ নিয়ে হল পাহারা দিচ্ছে। ছাত্রলীগ তাদের পূর্বের অবস্থানে অটল রয়েছে। গত রোববার ছাত্রলীগ এক সংবাদ সম্মেলনে বিশ্ববিদ্যালয়ের বর্তমান উপাচার্য, প্রক্টর এবং ৪টি হলের প্রভোস্টদের পদত্যাগ দাবি করেছে। ছাত্রলীগ তাদের ৮ দফা দাবি না মানা পর্যন্ত কোনো সমঝোতা বৈঠকে যোগদান করবে না বলে জানা গেছে। গতকাল ছাত্রলীগ আহুত লাগাতার অবরোধ কর্মসূচির ৬ষ্ঠ দিন অতিবাহিত হয়েছে। বিশ্ববিদ্যালয়ের এই অচলাবস্থা নিরসনে দীর্ঘ সময় লাগবে বলে একটি সূত্র জানিয়েছে। খুব সহজে এই সমস্যা সমাধানের কোনো লক্ষন দেখা যাচ্ছে না। বরং সমস্যা ক্রমশ জটিলতর হচ্ছে। ফলে বিশ্ববিদ্যালয়ের ১৪ হাজার ছাত্রছাত্রীর শিক্ষা জীবনে আবারও অনিশ্চয়তা দেখা দিয়েছে। সেশন জট ৩ বছর থেকে ৪ বছরে পদার্পন করছে। সে সঙ্গে সাধারণ ছাত্রছাত্রী এবং অভিভাবকমহল দারুণভাবে উৎকণ্ঠিত।